

Kalaallit Nunaannut naleqqussakkamik allaffissornikkut aaqqissuusseqqinnissamik pilersaarummik suliaqarnissamik Naalakkersuisut peqquneqarnissaannik Inatsisartut aalajaanngiffissaattut siunnersuut. Pilersaarut kingusinnerpaamik UPA2024-mi saqqummiunneqassaaq.

(Inatsisartuni ilaasortaq Doris J. Jensen, Siumut)

Siumumiik Doris J. Jensen siunnersuutaanut pingaarutilimmut, timitalerneqartariaqavissortumut qutsavingerusupparput.

Siullermik siunnersuut tamakkiisumik taperserparput, tassami pisariaqarpoq sukumiisumik iliiusissat assigiinngittut misissornissaat aammalu nunat allat sanillersuussinnaanagasut, assersuutigiinnarlu Savalimmiut qanoq allaffissornertik aaqqissuussimaneraat sanilliussilluni misissuinermi ilanngunneqarsinnaammat. Nunallumi allat sanilliukkuminarsinnaasut, isumassarsiffiusinnaapput. Uani pingaarnertut eqqaaneqarsinnaavoq oqaatsit atorneri, tassani sullissinermut inatsit aammalu oqaatsinut inatsit Kalaallinut salliutitsisunngorlugu aaqqissuunneqarsinnaapput siullertut.

Aappaattut allaffissornikkut nunarput tamakkerlugu isigisariaqarpoq, imatut paasillugu, Namminersorlutik oqartussat, kommunit, oqartussat suliffeqarfiutaat nalimmassartariaqarput, aningaasartuutit, sullissinerlu pitsaasoq, ajornanngillisagat aammalu pisariaqartuni qanilaartumik aaqqissuunnissaa nalilersortariaqarmat.

Uani pineqarsinnaapput aamma Inatsisartuni suleriaatsit aammalumi Naalakkersuisuni suleriaatsit. Tassami misissuinerpassuit, nalunaarusiarpassuit aallartinneqartarput, naak immaqa inatsisit allannortinnerisigut aaqqissutissat ugartorneqarsinnaangaluit, allaffissornerujussuaq pinngikkaluarlugu. Aammalumi immaqa suliat ilaat qitiusumiik ingerlanneqarunik imminut akilersinnaanerusinnaavoq, ilaatigullu killormut.

Pingajuattut nalunaarusiat, misissuinerit ikilisartariaqarpagut Inatsisartuniik, tassami Naalakkersuisoqarfiit allaffissoraluttuinnartiinnarsinnaanngilagut. Illuatungaaniilumi aamma

Naalakkersuisut suleriaatsit pitsanngornissaannut pisussaaffeqarput, Inatsisartummi peqquseqattaaginnarsinnaanngillat. Sapiissuseqartariaqarpugut oqaatsitta illersornerunissaanut.

Maani inersuarmi, ataatsimiisitaliani il. il. qallunaatut nutserinnaavinneq killilertariaqalerpoq, Kalaallit Nunatsinni oqaatsit pisortatigut pingaarnetut inississimasagut tingussaasumik atortariaqalerparput. Pisortani sulinermi, suliffeqarfiutitsinni oqaatsigut salliutillugit ingerlatsisariaqalerpugut, pisariaqavissortoqartillugulu aatsaat nutserineq atortarlutigu.

Nunami allamiut Kalaallisut paasisinnaanngornerussappata aammalu atuinerulissappata, pisariaqarpoq sapiissusilimmik aaqqiinissaq, oqaannaqattaaginnarsinnaanngilagut, iliuuseqartali.

Siumumiik pisariaqarsoraarput siunnersuuteqartup siunertaa naapertorlugu suliassaq ingerlanneqassasoq, takusinnaavarpullu aamma imaannaanngittuussasoq. Tulleriiarluakkamik, tingussaasullu ajornannginnerit aallartissutigineqarnissaat uani tulleriiarneqarsinnaakutsoorput. Imatut paasillugu, suliassaq annertungaarmat, aaqqissuuseqqinnerit assigiinngittut nalunaarusiannorlugit piareersakkat pilersaarusiornissaat Siumumiik isumaqarfingaarput. Oqaaseqatigiillu tulluarsarnerini allannguutissatut siunnersuuteqarluta imatut nipilimmik:

Nunatsinni allaffissornerup nunatsinnut tulluartumik nutaamik aaqqissuuteqqinnissaanut Naalakkersuisut suliaqaqqullugit peqquneqarnissaanik Inatsisartut aalajangiiffigisassaattut siunnersuut.

Naalakkersuisut allannguutissatut siunnersuuteqarput, allaffissornerlu annertusassanngikkutsigu aammalu siunnersuuteqartup qulequtaa aallaavigissagutsigu, Siumumiillu Naalakkersuisugut Kalaallit Nunaanut tulluartunik inatsisiliornissaq siunertarisuaannartussaammassuk, ataatsimiisitaliamut ingerlateqqinnissaa pisariaqarsorinngilarput.

Taamaasilluta siunnersuuteqartumut qujalluta, siunnersuut Aningaasaqarnermut akileraartarnermullu ataatsimiisitaliamut ingerlateqqipparput, sukumiisumillu pilersaaruserluakkamik sulisoqarnissaa innersuullugu.

Kuno Fencker, Siumut.